





備忘錄

思



仁
門
號
卷

114

午

備忘錄

清 桐鄉 張履祥 念芝氏著

日本 安中板倉勝明 节山氏校

卷四

子產曰：無欲實難。雖聖人不能使人無欲。安得人人無欲？而後能致治平。但因其欲而鼓舞化導之。使之一出于正。久而若忘而已。

繼治之治。用人之智去其詐。用人之勇去其怒。用人之仁去其貪。繼亂之治。用人之詐作其智。用人之怒作其勇。用人之貪作其仁。

周公聖人也。成王天子也。周公于成王叔父也。以叔父教兄子以聖人教天子。見于詩書者幽風而已。無逸而已。孔子聖人也。伯魚其子也。以聖人教其子學詩學禮而已。然則聖人所以修己。所以貽謀者可知。貧賤能不忮不求。富貴能不驕不吝。便有身分可向高明也。今之貧賤者。不忮求幾人。富貴者不驕吝幾人。以吾人視世人。已多不堪。見聞者以聖人視吾人。其不可見聞。當不啻于吾人之視世人矣。然聖人則曰。吾非斯人之徒與。而誰與。於此可知躬自厚之道。於此可知滿腔子惻隱之心。故曰。好言無好人三字者。自

賊者也。

必不得已而不能去食。如宣公初稅畝。哀公患不足之類。必不得已而不能去兵。如宣公作邱甲。僖公乞師於楚之類。不能自強。民心不附。曾何濟于衰弱哉。放鄭聲遠佞人。自一身一家。以至國與天下。無不皆然。鄭聲惑溺心志。佞人變亂是非。雖有善者亦無如之何矣。女樂受而孔子行。萋菲賦而王室亂。易曰。介于石。不終日。貞吉。其知幾乎。

好行小慧。非必大爲姦惡。如士而溺於文辭。農而越阡度陌。工而奇技淫巧。商而人棄我取。人取我棄。凡夫

見小不見大，伸邪不伸道。役其私智，不軌正理者皆是。卽若吾人平日好逆詐億不信，最易入小慧一路。義以爲質，必須禮以行。孫以出信以成，無小大莫不如此。

無暴其氣者，猶之記云：使惰慢邪辟之氣，不設于身體也。亦猶云：使耳目鼻口心知百體，皆由順正以行其義也。凡記所云：周旋中規，折旋中矩，趨以采蕡，行以肆夏等類皆是。

延陵同學語：予曰：先師於陽明雖瑕瑜不掩，然未嘗不深敬。而子何疾之深也？得毋同異？予曰：何傷乎？孔子

大管仲之功，而孟子羞稱之。彼一時此一時，道固並行而不悖也。

儒者立心，須是自與天地民物相關。否則雖曰好修小人儒而已。

吾人平日爲學，大指專守孔門博文約禮之訓，以終身而已。讀書窮理，博文之事也；切實踐履，約禮之事也。儒者功夫，只居敬窮理爲無弊。窮理所以致其知，知之至而後行之利。敬則統乎知與行者也。始終只敬字爲主，故曰居。猶諺謂作家當也。

儒者立身，當思爲法天下，可傳後世。事無大小，義所當

爲何可不勉于所不當爲何可不慎

從心所欲不踰矩讀師冕見及見齊衰者見冕者與瞽者兩節及鄉黨一篇可見吾人下學功夫當從曲禮

少儀內則等書用力

仁義以爲主節制以行之技擊以角之故君子有不戰戰必勝矣橫渠善言兵

不忮不求固立身之大目近雀者恒彈近虎者恒射賢人君子處于亂世尤當思全身遠害之道避人之義不可不講也

凡人之出言其淺深高下必因其德之所至蓋有不知

其然而然者聖人何心俛而就卑賢人何心引而自高蓋聖人之德如天地無不覆載而實夫婦之愚可以與知與能則莫不尊親矣賢人之德如華嶽河海望之自見其崇深而不可幾及則尊而仰之矣在聖人初何心于人之親之賢人亦何心於人之尊之也一身之威儀氣象亦然

大都學者于詩書朋友總只一般日親則日近日遠則日疎然其數常相勝親其所當疎則必疎其所當親勢甚可畏也要在慎擇而明辨之

一友問教童子記誦固是收其放心然一往記誦又不

見長進如何而可。曰：教之用心而已。心之官則思。心官不失其職。自能長進。或隨事問其義理。或設難令其分析。或聽言察其記憶。或見人質其邪正。皆是引其用心之方。嚴陵方氏曰：君子之心。將有爲也。不必盡善。以能有所思。故不善終不成焉。小人之心。將有爲也。非盡不善。以不能有所思。故善終不成焉。是以知用其心之爲貴也。

剛健中正。凡聖人無不同之。若純粹以精。則孔子所獨至也。

若決江河。就聖人分上說。有聖人之若決江河。就學者

分上說。亦有學者之若決江河。如吾人日用之間。聞一善言。見一善行。心解而力行之。沛然莫禦。亦是此種氣象。

同此天地。同此萬物。各得其所則治。各失其所則亂。聖人參贊化育。只是使物物各得其所而已。各得其所便是行其所無事。行所無事。則篤恭而天下平矣。羔羊詩註。在位皆節儉正直。自古未有正直而不由節儉者。不節儉必不能正直。

作用是才。不是性。才乃性之作用。才出于性。則能經綸天地。不出于性。則至于放肆邪侈。

或疑行道而有得于心之義。曰。仁義禮智根于心。爲有得。見諸言語行事之實。無不合乎天理之當然。而可爲人之所共由之。爲行道。本乎無聲無臭。而達之人倫庶物。有諸中形諸外。所謂行道而有得于心者也。若不從行道上見。何從而見其有得。然同一行道也。有得于心。與無得于心者。氣象自遠。不同此誠僞王霸之所由分也。

天不離乎日用之間。詩稱學文王。卽是學天。故曰儀刑文王。萬邦作孚。文王卽天也。吾人學聖賢之言。行聖賢之行。便是事天之實。否則卽爲獲罪于天。豈在大

哉。夙夜寤寐。所以不敢不敬。小人不知天命而不畏。只緣看得天道。遠與日用無涉。故違理徇欲。放辟邪侈。學者肯實去做功夫。方是學。如學耕須去習耕。學醫須去習醫。中心悅而安之。若樂聞善言。喜見正行。亦是學之始事。與拒而不聽信者異矣。不聽不信。聖人其如之何。

謹言慎行。與存心養性。非有二項工夫。故不動而敬。不言而信。所以事天也。

勤儉之義。今人多忽之。不知堯舜所以爲聖。亦不外此。舜不待言。堯耄期倦于勤。天位便須禪了。大禹克勤

於邦克儉于家卽承堯舜之歷數故承禹之道想亦如此至太康逸豫滅德卽喪亡矣及周之衰唐風之美俗號勤儉故曰陶唐氏之遺人在天地間自天子至于士庶何人可以無此二字讀無逸一篇此義尤明。

善惡二字分數不同無所不至小人之惡也不耻不仁不畏不義之類也過中失正君子之惡也隘與不恭之類也存諸心措諸躬何可不慎斯須不慎卽陷于惡吾人日用之間應接事物自謂無惡而不知其入于惡者多矣是以德之不修學之不講夫子猶以爲

人吾憂山陰先生教屠子威曰着實思惟着實踐履將身心整頓起來思惟者致知也踐履者力行也吾人病痛多坐不能整頓所以一往頽塌

自天子至于庶人有國有家俱以親親尊賢爲本親親則可久尊賢則可大曲朱陶補文選書序盛世出而在外多正人君子所以人遊於京華及通都大邑事其大夫之賢者友其士之仁者自能見聞日富人品日高其學問不期而日進當是時士安于窮鄉僻壤如何得上達若衰世出而在外者率皆無耻

小人所以人一旦出遊所見所聞無非卑汙苟賤之論傾險機變之事一與之接自然識見日就庸惡陋劣雖有美質不自知其陷溺其心矣人品安得不日流而下君子遠庖厨畏鮑魚之肆此意安得不切切處亂世惟有入山林遯鄉曲求明師良友讀聖賢書與父兄子弟修其孝弟忠信而已探湯履虎之懷無刻可不操之也

入則孝出則悌守先王之道以待後之學者卽是贊天地之化育

人須有奮發有爲之意易六子以震爲長蓋不動則不

可入才能動便能入故次巽入便能變化物遇水火無不變化者故中爲坎離變化既成而後能各止其所得其所止則悅矣故終以艮兌天地生物之序是如此人事學問之序無不如此故曰君子深造之以道欲其自得之也發憤忘食樂以忘憂所居而安者易之序也

曹月川先生盛德之士其學粹然一出于正明初中原氣盛所以與河東夫子先後並生以昌明此學未幾而康齋敬齋繼作不可謂天之無意斯文乃白沙甘泉隨于其時爭鳴則已爲姚江先後奔走之資矣

若夫克菴不得善其終。將疑後死者。不得與于斯文。勢之所重。整菴涇野。不能回狂瀾于既倒。區區清瀾。欲障百川而東之。宜其難矣。

聖人與天地合其德。博厚高明。悠久也。無不持載。無不覆幬。博厚配地。高明配天也。如四時之錯行。日月之代明。悠久無疆也。學者修德。修諸此而已。曾子曰。士不可以不弘毅。弘非博厚。高明不能毅。非悠久不能。心具衆理。故窮理所以存心。性卽理也。天卽理也。故存心則知性。知天。

欲得義理通明。須從萬物並育而不相害。道並行而不

相悖。小德川流。大德敦化處。體驗有得。方是可歎今之學者。皆舉一廢百之類也。舉一廢百。總由不好學處。患難之中。惟有舍命不渝一道。若有意求生。則凡可以得生者。將無所不爲。未必得生。而徒至害義。若能守正俟命。不以死生爲念。或未必死。則所歷艱難險阻。無非堅人之志。而熟人之仁。爲益已自不淺。易于困有致命遂志之義。蓋以是也。

持敬功夫。只憂不密不熟。打破敬字之語。乃蘓氏私心。欲壞程門之教。故爲譙浪之言。以亂之。不第當入東銘之戒而已。後世往往以爲美談。見人纔有嚴威儼

恪之意便將以是爲言。曾不思如見大賓。如承大祭。此心何時可忘。直至邦家無怨。方是熟之效也。是以執事之敬。雖之蠻貊亦不可廢。學者自宜信此不惑。守此不渝。

圭璋特達。犬馬不上於堂。尊卑貴賤。萬物固有定分。不可誣也。得其分則理。失其分則亂。

聖人齋戒以神明其德。吾人持敬功夫。不能嚴密。宜其志昏氣惰也。須時時存湛然純一。肅然警惕之心。吾人爲學。只正已而不求于人。一語是立腳處。蓋正已則可仰不愧天。不求于人。則能俯不怍人。

人心惟危。道心惟微。如何使得心正。要得道心常爲一身之主。而人心聽命。須是致知誠意。而後可以庶幾。世之好言心學者。先遺郤格物一項工夫。則其心之所以爲心。正孟子所謂蔽陷離窮而已。生於其心。害於其事。身之不修。不亦宜乎。

吾人今日爲學。只是因其性之所近做工夫。過中失正處。必然多有慎。不可執已以律人。自以爲是。而無虛受之益。蓋學絕道喪。旣不得聖人以爲依歸。又不遇大賢之士。正其得失。惟有虛心遜志。時時將經書義理。及儒先所講明。體驗省察。以防檢其身心。而又得

好學深思之友，相與觀摩匡救，庶幾不至舉一廢百，陷於邪慝而不自知也。

古人凡事謹小慎微。若家庭之間，尤爲繁要。能於嫌隙幾微處，潛消默化，不使積漸而長。卽大者可小小者可無。否則無者不難生有。小者可以成大。可畏矣哉。頌之所以有小毖也。

反求諸已，無不可告人處。橫逆之來，聽之而已。若再起一彌縫要結之念，卽入違道干譽之途。小人之道也。君子恥之。

懲忿窒慾，乃遷善改過之門。默自循省，只患懲忿之功

疎

日用之間，一念不敢忽易，卽是敬。一念認真，卽是誠。誠敬者，進德之基也。但能事事物物皆然，則至於純熟不難矣。然須求得義理之正，所以讀書窮理爲要。否則，自以爲敬，未有不至於慎而無禮。自以爲誠，未有不至於果敢而窒。

程子有云：舉業不患妨功，只患奪志。人苟志不爲所奪，雖作舉業無害否，斯言不然也。人苟志不爲富貴利益，豈無一事可爲？何故而必爲舉業？夫志氣之帥也。豈有志既奪而功不妨者。

聖賢教人必不使其但爲空言。今之談士，輒好言吾與點也。而於子路冉有公西華之志，則鄙而不屑。何不反已自量，果能爲國三年，可使有勇知方否？能使足民否？宗廟會同，能爲相否？無一能之徒，爲大言，不知窮經稽古，隱居求志，誠何義也？

君子喻義，小人喻利。正如陰陽寒暑之對待。夫子罕言利。孟子戒言利爲後世人欲益熾，勢如烈火。玉石俱焚，又如洪水懷山裏陵，不得不大爲之防也。然天理人欲，同行異情。利亦生民之所不能已。天地何嘗不以美利利人？故易之爲教，使人趨避各得其宜而已。

故曰：利者義之和也。如過惡揚善，舉直錯枉，饑食渴飲，夏葛冬裘，物各得宜，則雖不言利，利莫大焉。吾人日用功夫，居則觀其象而玩其辭，精義而已。動則觀其變而玩其占，徒義而已。何必曰利？

姚江謂大學之道，誠意而已。今觀其言，無非自欺欺人之語，誠於何有？

學者第一是先去己私。己私莫大乎驕吝。姚江著書立說，無一語不是驕吝之私所發。又其言閃爍善遁，使人不可把捉，真釋氏之雄傑也。

自周釐王受曲沃之賂，以武公爲晉君，使得列于諸侯。

其後魏斯趙籍韓虔襲其故智以威烈王之命爲諸侯田常亦賂安王而有齊國戰國之間于戈日尋至秦并天下遂廢封建推本而論釐王之罪大矣揚之水豈曰無衣之詩所以列于國風也與

衛靈召子朝于宋蒯聵耻之欲殺南子得罪而見逐越三年而靈公薨蒯立而蒯聵入輒拒之敬王四十年蒯聵因渾良夫孔伯姬以入衛劫孔悝以逐蒯而自立仲由死之輒奔魯又奔齊次年衛莊公飲孔悝酒而遣之悝載伯姬奔宋又明年衛莊公不朝于晉趙鞅伐衛逐莊公而立公孫般師晉師還莊公復入石圃

作亂莊公死于戎州己氏齊人伐衛立靈公之子起執般師以歸又明年石圃逐其君起起奔齊輒自齊復歸于衛逐石圃元王七年衛褚師比及諸大夫逐輒輒奔宋請師于越明年越舉如后庸宋樂茂魯叔孫舒伐衛納輒衛公孫彌牟重賂越人申開守陴而納公公不敢入師還立蒯聵之弟歎是爲悼公輒卒于越父不父子不子變亂一作二十餘年不息禍亦烈矣哉皆靈公無道之所致也夫子爲政而先正名豈迂乎

守本分三字淺言之鄉里恒人優爲之若推其極雖聖

人不過是也。蓋天生蒸民，莫不具性分之所固有。自天子至庶人，莫不有職分之所當爲。能盡其分，守而勿失。聖人何以加不悶二字？其義亦深。安土樂天，不悶之謂也。遯世無悶，不知不慍，樂在其中。不悶之謂也。程子宜其亟稱之與。

天之道福善禍淫。王之道遏惡揚善。人之情好善惡不善。順天理遵王路，直道而行之。窮通得喪，任之而已。斯道晦明通塞皆天也。在人宜學古修身以俟之。儒者立心，便以四海九州爲量。其功夫則自克勤小物做來。

百年以來，朝野習氣類皆以直言爲諱。甚至父子兄弟之間，亦尙緘默不言。寧使父子兄弟見惡于鄉黨隣里，在已必不敢言，以爲惟恐以言見罪。此何心乎？宜其禍亂不息，而風俗日偷也。

富貴福澤壽考康寧，子孫衆多，貧賤憂戚，鰥寡孤獨，夭折疾病，總是天地間人受之。安有在我咸集其休祥，而人受其凶害之理？偶值其休，須無忘死于安樂之義。戰戰慄慄，思保其終，遇其不淑，當深思生于憂患之義。休惕惟厲，以出于險。若安而忘危，窮不求通，民所爲下而已。

吾人一日之間能隨時隨事提撕警覺便不到得汨沒當睡覺之初則念雞鳴而起爲善爲利之義平旦則念平旦之氣好惡與人相近否日間則念旦晝之所爲不至梏亡否以至當衣則思不下帶而道存之義臨食則念終食不違之義及暮則思嚮晦宴息以及夜以繼日記過無憾之義如此則庶幾能勿忘矣乎若其稍忘卽當自責自訟不已

日用飲食當乎義理處卽是道然終日汨汨其身心於此又實害道蓋太極不離乎陰陽而亦不雜乎陰陽也此際全在存養省察

聖賢臨事以仁義爲本利害有所不計世人臨事以利害爲主仁義有所不知此喻義喻利所由分也人於人倫庶物苟爲懷利則仁義之心日就牿亡苟懷仁義則見利不趨見害不避但叔季人情纔說仁義便憂與貧賤禍患相及是以不敢爲而不知仁義未嘗不利也

曾子大勇從臨深履薄中來孟子浩然之氣從非仁無行非禮無由中來

文中子多言不可以遠謀多動不可以久處兩言可以佩服爲觀人取士之法

齊宣待孟子以客卿禮際已不爲薄特以諫不行言不聽無所改于其德故不可久于其位耳去齊之日其謂時子之言所以處孟子者亦未爲失特以不出于尊德樂道之誠故不可虛拘耳於此可見浩然之氣劉靜修詩記錄紛紛已失真語言輕重在詞臣若將二字求心術恐有無邊受屈人大抵漢代而降史書多不足信而三百年以來尤甚讀史者觀其人之可信而信之則庶乎少失矣

立身有立身之本立家有立家之本本者何仁義是也若惟利是圖不修仁義是自拔其本也獨不畏于天

心爲一身之主人人具有一心此心同于聖人言語行事與聖人同則聖人矣此心同于賢人言語行事與賢人同則賢人矣此心同于衆人言語行事與衆人同則衆人矣此心同于小人言語行事與小人同則小人矣此心同于禽獸言語行事與禽獸同則禽獸矣如何可不孳孳爲善欲爲善如何可不學問山有榛隰有苓何地無賢遇不遇命也然誠之所感鬼神通之高宗恭默思道夢帝賚予良弼君子不謂命也所責于己者誠有不至耳

蕭統陶淵明傳無一語得淵明之實所載五柳先生傳雖其自作亦非淵明本來如此蓋必其晚年文字隱居以後所著也性嗜酒三字全非酒乃淵明有托而然自以曾祖晉世宰輔耻屈身後代亦非其本指然則劉裕未篡以前何爲卽不仕乎淵明學識晉宋間人無能及之者讀其詩自見之

呂涇野先生天資純厚篤實不難至于聖賢然其學問不能及文清康齋者豈亦以少年登高科爲美官之上故乎

頤中虛中孚亦中虛蓋惟虛中無我方可養德方能感

物頤全體皆虛中孚二體中實感物以誠進德則全在虛受也

人爲萬物之靈誠能日思此義則知仰愧俯怍而於學問自不能已人爲萬物之靈如何孳孳爲利一旦晝所爲揩其良心而下同於禽獸乎念此如何不戒謹恐懼凡人何必大惡然後下同於禽獸只饑食渴飲好佚惡勞男女之欲口體之奉而不知性分之所固有職分之所當爲卽是物類也

庶出之子不肖者十恒八九人性皆善雖曰氣稟使然

豈盡下愚不可移易多因嫡母陰懷嫉妒以爲非其所出教誨不先而所生之母出於微賤又不知教誨之道甚而其父或因晚年所得或是偏愛私寵不求嚴師以教育之非姑息以成其縱肆則導以庸下短淺之見以及機詐詭昧之行迨乎漸長習與性成自非好學親賢鮮有不流於邪僻者矣

徐仲車朝夕具公裳以揖母雖敬親之道當如此然不免太過朔望則具公裳可也朝夕袍褶不爲不敬況嚴威儼恪非所以事親也公裳朝夕用之反疑於斂大都仲車行事類愚者多如畜犬近於數十曰不忍

其母子之分離此豈勢之可久且凡物皆然何獨犬也買肉初欲就其家而必迂途再往買之以歸父名石卽終身不履石種種見其立心之誠而亦未免於蔽則爲學而氣質未能盡變之證也

詩書等以垂訓而誦詩必先于讀書者以歌詠易以感人凡人好善惡惡之心旣動而後可進于義理耳亦興于詩之意程子曰教人未見意趣必不樂學正此意也

鬼神體物不遺故人物之生皆具知覺之體告予生之謂性之言于此似亦見得但不知一陰一陽之道人

得之卽爲率性之道。故止知食色之爲性。而不知仁義爲我之固有也。朱子註明德者人之所_三得乎天。而虛靈不昧。所以具衆理而應萬事。最詳最備。近世講學者于虛靈不昧。則稱之于具衆理應萬事。則非之。此正告子無善無不善之弊。入于異端而不覺也。禮者天理之節文。若人之言語行事。合于天理。自然有節有文。若無節無文。則直情徑行。便已不是天理矣。禮義三百。威儀三十。自有之節文。不待安排也。古之教人。仁義道德而已矣。今之教人。聲色貨利而已矣。古之學者以實行。今之學者以空言。世道人心。安

得而不日壞。

讀書錄後人讀之。當從續錄讀起。蓋公晚年所著也。續錄與前錄同者十七八。則見其始終用功。只是一路。不雜不輟。不雜之謂精。不輟之謂一。

論語曰。放於利而行多怨。孟子曰。苟爲後義而先利。不奪不饜。凡利于己者。必害于人。故怨與奪隨之。然聖人作易。則使人趨利而避害。利亦生人所不能已。書曰。惠廸吉。從逆凶。又曰。作善降之百祥。是取之于天也。孟子曰。不違農時。深耕易耨。穀不可勝食。又曰。數罟不入洿池。斧斤以時入山林。魚鼈不可勝食。材木

不可勝用。是取之於地也。孟子曰。樹牆下以桑。匹婦蠶之。可以衣帛。雞豚狗彘之畜。無失其時。可以無失肉。是取之于物也。易曰。積善之家。必有餘慶。正蒙曰。師道立。善人多。子孫賢族乃大。是取之于人也。如此則利于己。亦利于人。易所謂不言之利。利者義之和。利有攸往。無不利。大槩如此。舍是而言利。鮮不得罪于天。豈創業垂統。爲可繼之道。

凡人日夜用心。一思再思。能不外乎性分之所固有。職分之所當爲。則庶幾其能有進。而過失亦可少矣。

吳忠節公常言。要窮就窮。要死就死。所以後來能以身

殉國。蓋人之失身。只爲怕窮怕死。所以無所不至。要窮就窮。卽是志士不忘在溝壑。要死就死。卽是勇士不忘喪其元。平生矢志如此。臨難所以能不回惑。人之立節。夫豈一朝一夕之故哉。

喪事不敢不勉。無問輕重。亦無問人已。不能三年之喪。而總小功之察。固不可。若送死大事。一意輕忽。亦何可乎。子見齊衰者。雖狎必變。是日哭則不歌。食于有喪者之側。未嘗飽。皆本此意而推也。詩曰。凡民有喪。匍匐救之。記曰。隣有喪。眷不相。里有殯。不巷歌。一部禮經。喪祭居半。古者聖賢用心。無不如此。吾人立心

行事只患不誠不憂太過也。嘗見越中人家臨喪必有宮中之相。左右各張一榜。自斬衰以下五服男女無不書名。雖族人無不袒免者。自敦匠以至飲食之細。執事無不各有其人。人子哀戚不得不至。記所謂以故興物。不肖者踰而及之。蓋以此也。

古者天子有天下。諸侯有國。鄉大夫有家。三代以下士庶人之家。傳之先祖。編之邦籍。亦與有國無異。人在覆載間。無論大小。強弱盛衰。畧如比隣而已。畏天之威。于時保之。創業垂統。爲可繼也。之義。人人常存此心。人人常勉其事。孟子交鄰一章。以大事小。以小事

大樂。天者保天下。畏天者保其國。事勢雖有不同。理則一耳。自恃其盛強。而陵弱暴寡。固已逆天之理。天不佑之。若不安于弱小。而敵強圖大。亦豈綱繆牖戶之道。其義有二。世守也。非身之所能爲。一義也。里仁爲美。擇不處仁。焉得知。又一義也。要當不失文王我師之意。則處盛強固可。處弱小亦可。修德行仁。非禮弗履。自強之道。莫過于此。若夫成功則天也。

學者苟不從事講習討論。雖欲省察克治。茫然何所用力。然講習討論之事。父兄師保。猶可得之於子弟。若夫省察克治之功。父兄師保。無所用其力矣。故修曰

自修

老氏之養生。總是私其身。吾儒之養生。正爲公其身。然能養其德。則不必更言養生矣。養德可兼養生。養生者不能兼養德。亦便有小體大體之別。大抵人品學問。總不出興詩立禮成樂三節。其爲人也。好善惡不善。見義肯爲。知過肯改。秉彝之良。誠切於心。此興詩中人物也。若修身砥節。堅確不移。獨立而不懼。臨事而不回。言行矩。有物有恒。此立禮中人物也。若夫氣質盡變。德性安和。表裏內外。純一不雜。知明而行羨。恭敬而溫文。此則成于樂中人物矣。目

前朋友據其所得。只是前兩節人爲多。然至此已自不易也。

恭已則寬信敏公俱備。故曰篤恭而天下平。恭已正南面而已矣。

賊仁賊義。不必弑逆大故。然後名之。只日用之間。親其所疎。疎其所親。以賢爲不肖。以不肖爲賢。自少至老。積貫習熟。而不知變。希不_下至于拂人之性。災遠夫身者。

先儒謂讀書把截四路頭。竊謂人之爲學。亦有四路頭。先要把截。否則讀書雖多。終無入德之理。或以爲問。

甲 先要把截。否則讀書雖多。終無入德之理。或以爲問。

頑夫也下恐脫

藏板

曰孔子所謂四路頭色厲內荏也道聽塗說也鄉愿也鄙夫也孟子所謂四路頭頑夫也鄙夫也薄夫也一心不能自主何以應萬事而不過失此大學欲明徳于天下所以必始于格物孟子之不動心必由于知言養氣也

古人渴不酌貪泉之水飢不食嗟來之食雖當困阨行乎貧賤不忘溝壑而已何可每事苟且呂氏曰逢人卽有求所以百事非戒之戒之一事苟其餘皆苟何可不慎

心麤性急讀書之至戒

理明義精則能知言知人知言知人則神閒氣定而此心能宰制萬物程子所謂金革百萬與疏水曲肱一般如此方可以成天下之務定天下之業所以學莫先于窮理窮理之益莫大于讀書

古今異宜時勢不可強孟子言仁政而云必自經界始經界之法自今可舉而行若井田當時尚未盡廢已云若夫潤澤之此可見聖人通變宜民之意非執一槩以強人也如云莫善于助莫不善于貢今日條邊之法貢法也然行之尚可以相安若助與徹則斷不可行矣父子兄弟尚不能同心用力而欲八家通力

合作計畝均分得乎。今無論官民貴賤相欺相壓雖閭里親舊尚且相凌相殘欲行助法是速禍召亂也。助與徹豈非聖王良法美意而不能不審時度勢如此推之可槩其餘。

養德養身非有二義大學曰德潤身未有薄于德而能厚其身者。

命之定于理者無不同仁義禮智之賦于天者是也。然一涉于氣則昏明強弱清濁厚薄固已萬有不齊矣。若富貴貧賤壽夭之類往往人之大小不同數亦因之有異其止係一身之窮通得喪者以一身推之可

矣。有係一家之廢興存亡者有係一方之利病休戚者有係一世之治亂盛衰者或宜窮而通宜通而窮或宜壽而殃宜殃而壽此豈可以一槩論乎君子修之吉而未必吉小人悖之凶而未必凶聖賢于此惟有守正以俟之而已。

中者聖人之德正者賢人之守學者由正以至于中猶以規矩爲方員希賢而後希聖也若好言中而忽言正鮮有不失已與人者。

欲爲名世之學當存王者之心王者之心天地父母之心也。

堯舜性之不言學其用功夫惟精惟一允執厥中而已。其後惟傳說告高宗始言學然其言正與論語先後一揆其曰惟學遜志務時敏卽論語學而時習之之謂也。其曰惟教學半念終始典于學厥德修罔覺卽論語有朋自遠方來之謂也。其曰學于古訓乃有獲卽論語好古敏求之謂也。學者本此成法做功夫方能日進無疆。

語直傷交今乃知之故曰忠告而善道之不可則止又曰朋友數斯疏矣何可自信直諒一往不顧。

家庭之間一言一動當思爲父子兄弟足法言必有物

行必有恒方能刑于寡妻至于兄弟

好問好察隱惡揚善則四海之內皆將輕千里而來告

之以善取善其有窮乎

呂氏有言逢人卽有求所以百事非血氣既衰之人不可不重以爲戒

朝廷言路開豈無不善之言雜然而進然而忠言得至於耳凡夫政事之闕失四方之變故天下之賢才官方之臧否皆得聞知所以治安而國家可保也若言路閉塞小人害國之言固不得入然而忠言不至耳細大之務咸罔聞知所以亂作而至于危亡也

古今稱舜者曰德爲聖人濬哲文明溫恭允塞爲法天下可傳後世性之者也皆以其盛德而言若其所以爲舜者在孔子則云好問而好察邇言隱惡而揚善執其兩端用其中於民孟子則曰由仁義行又曰自耕稼陶漁以至爲帝無非取於人者又曰聞一善言見一善行若決江河沛然莫之能禦尚書亦曰稽於衆舍已從人明四目達四聽其事親也則曰負罪引愚廢廢齋栗而已非有殊異不可倣倣之事也然則人皆可爲豈欺予哉

今之學易者好爲異論窮深極微而于日用全無所益

如此卽無易可也學易者貴得其用只六十四象辭得其一句兩句終身用之而有不盡如乾君子以自強不息咸之虛受人等類便到聖人地位亦不外此卽如訟之作事謀始歸妹之永終知敝旣濟之思患而預防之豈獨訟與歸妹與旣濟爲然哉推之大事小事無不皆然是故君子之于易沒身而已矣道理須是舉目可見舉足可行方是實理功夫須是當下便做得方是實功道在邇而求諸遠事在易而求諸難則惑之甚也

今之言學者約有二種重致知者好言靜悟而忽踐履

爲不足事。是則所謂窮深極微而不可以入堯舜之道者也。尊力行者。矜言踐履而以窮理致知爲不足爲。是則所謂淺陋固滯而不能進于高明之域者也。至于互相非詆而邪說由之以生。以至相與分爭而暴行因之以起。譖滛邪遁之言。洪水猛獸之行。豈在學術之外哉。

立人之道。曰仁與義。人之所以爲人。仁義而已矣。仁者人也。親親爲大。而親親則有殺。義者宜也。尊賢爲大。而尊賢則有等。若親其所疎。而疎其所親。以賢爲不肖。以不肖爲賢。是其所非。而非其所是。施之于家親。

愛賤惡哀矜畏敬敷惰。無往而不辟。已足傷敗彝倫。滅絕天理。賊仁之賊。賊義之殘。何必在大。

聖人以此洗心。退藏于密。洗心者。濯去習聞習見之心。使其心全體皆易也。密字今人說得無形無踪。都不成義理。要之卽上文惟深惟幾之義。

聖人之心。真同天地。隨舉一事。敦化川流。無不周具。卽如六十四卦象辭。凡夫天下古今。大經大法。與夫人生日用之常。食息寢興之細。靡不各有至當之理。以示人學者。本此引而伸之。觸類而長之。則法象之間。何往非學。

詩書稱舜之德。大約虛懷樂善之意多。頌文王之德。大約剛健不息之意多。吾于舜之所以爲舜。得一虛字。文之所以爲文。得一敬字。

肅肅在廟。人猶可勉而能。若齋齋在宮。則非可勉而能。蓋在宮之人。不過左右瞽御之徒。豈能盡賢且智。語言動作。皆能稱文王之意。自非德盛化神。何以微顯細大。一不干其太和耶。予懷明德。不大聲以色。此際苟深思而法則之。終身之憂惡能不切切耶。意者顏子之不遷怒。不貳過。其殆庶幾也與。

人能深思。有物有則之義。則德之不修。不容不切。終身

之憂矣。此意孟子說得親切。曰。人之有是四端也。猶其有四體也。又曰。仁義禮智。非由外鑠我也。我固有之也。弗思爾矣。如此諄諄告人。猶不能反而求諸已。真可哀也。

門內之治恩。揜義忿疾于頑。亦見學問不得力也。胡不中克治。舜處頑父。嚚母。傲弟之間。只負罪引慝。反求諸已而已矣。上不怨天下。不尤人。

居上不驕。高而不危。滿而不溢。自天子以至庶人。欲長守富貴。未有不然者也。

自古文章關乎世運。蓋言爲心聲。人心感物而形于言。

一人之心有邪正故其言不足憑若億兆人之心則公而無私矣皆不知其然而然卽所謂莫之爲而爲者天也莫之致而至者命也盛衰理亂有開必先知微君子必能辨之

中庸章句第一章大註所云蓋欲學者于此反求諸身而自得之一言足蔽千聖遺經之指亦足蔽千古學人爲學之指人能于聖賢之書字字句句反求諸身自能有得不然讀書雖多無益也

尚書艱哉欽哉懋哉雖非一人之言亦非一時之言然

義實相兼人之所以不知勉力者由不知敬也所以

不能者由不知艱也知艱則能敬矣能敬則不敢不勉矣隨舉其一義無不兼

輕視禮者希不流入于禽獸之域一身一家亦然邦國天下亦然

禮爲立身之幹爲世道人心計當以關中之教爲先教子弟亦以學禮爲急所謂六陽從地起也又曰唯禮

可以已亂

人本天地之氣以生天先乎地此愛之本也地承乎天此敬之本也樂由陽來生乎愛禮由陰作生乎敬故愛敬盡于事親而德教加于百姓刑于四海所以爲

至德要道不可斯須去身也。

孝無他得親之懽心而已中庸言悅乎親孟子言順乎親順較悅更進一步然順斯悅矣道惟在誠與敬故養曰敬養亦曰忠養。

大學言明德而急于致知者良以知之不致非特人之美惡有所不知卽已之善惡有所不知矣况在事物乎。

二氏亦有言及克己者但其所謂己聲色嗜慾而已聲色嗜慾已之麤且淺者也世多有淡于聲色嗜慾之人而不足以入道故須復禮禮儀三百威儀三千無

非道也又况淡于聲色嗜慾之人往往執己自是非堅僻乖戾卽傲物肆志其去道益遠。

惟禽獸爲無禮禮廢則世必亂自古如斯故嵇阮王何厥罪浮于桀紂

天下道理總不出費而隱三字子思此言所以爲喫緊示人也刑名功利之家於費處亦見幾分但遺却隱處釋老之徒於隱處亦不無所見但遺却費處所以爲異端至程子云體用一源顯微無間則發明無餘蘊矣學者苟能深思而自得之則于道其庶幾乎天何言哉隱也四時行百物生則費矣仁義禮智根于

心隱也。猝然見于面。蓋于背施于四體。不言而喻。則費矣。無極而太極。三才一太極。無非是也。三字不特可盡中庸一書之義。天地之間。四書五經。莫非此理。充塞彌綸。

目下省身克己。懲忿戒暴。是第一事。不能自克。何以爲遷善改過。

人在天地間。所以相去絕遠者。學與不學而已矣。其學之所至。所以相去絕遠者。立志之大小。用功之疎密而已矣。甚淺近而易見。嗚呼可不勉乎。

今世貧士衆矣。皆將不免飢寒。宜以教學爲先務。蓋亦

士之恒業也。凡人只有養德養身二事。教課則開卷有益。可以養德。通功易事。可以養身。兩益均有。舍此不事。則無恒業。何以養其身。無以養其身。不免以口腹之害爲心害。便將敗德。但此際須本忠恕之道。不可失其本心。

天地間只此五行。相生則木火土金水。相克則水火金木土。只此六位。各當其位。則既濟。各不當其位。則未濟。所以聖人在上。萬國咸寧。不待易民而治。要使君子小人。各得其所而已。

要不悶守本分六字。程子嘗亟稱之。蓋自天子以逮庶

人各有本分。各守其分。求盡所當爲。卽將惟日不足。上不怨天。下不尤人。何悶之有。

天生蒸民。有物有則。有人斯有道。故曰道不遠人。大則君臣父子。小則事物細微。凡一身之視聽言動。日用飲食。無非道也。故曰不可須臾離也。離人而言道。卽爲異端。不能盡人之道。卽爲曲學。不可以爲道矣。何以體道。曰心而已。故下文曰。忠恕違道不遠。然吾儒言心。異端亦言心。但吾儒之心。施之于倫常日用。實從言行上見得誠也。異端之心。耽空守寂。不誠無物而已。與有物有則之義。正相背。故末簡言庸德庸言。

而曰君子胡不慥慥爾。

譏滛邪遁之辭。何必異端。只近日講學之人。主靜悟者。鄙躬行爲麤淺。尊踐履者。薄格致爲空言。各蔽于一隅。所謂譏也。多其辨說。不根極于理道。所謂滛也。固則古昔離經畔道。竊異端近似之言。以亂正道。若苗之有莠。鄭之亂雅。非邪乎。知其說之有敝。更以他說濟之。或爲兩是兩非之論。非遁乎。此種心術。存于中臨事害事。臨政害政。爲禍不小。甘雨亭

六爻皆有首出庶物之義。故曰爲父爲君。又曰乾以君之。文言二爻言君德。則曰謹曰信。曰闕邪存誠。善世不伐。三爻則曰忠信進德。立誠居業。而不一言及于聰明。知至知終。則以學問爲事。亦不言生質也。尚書四岳薦丹朱而堯曰否德。棄帝位。其否德之實。則曰嚚訟。嚚則不能忠信。訟則不能虛已。欲如禹之聞善。則拜湯之從諫。勿咈改過。不吝必不可得矣。四岳言其啟明。必是明敏過人的人。然忠信不足。而明敏過人。爲害正大。紂之智足飾非。言足拒諫。豈不明敏過人。然卒至於喪亡。則可鑒矣。

世人多以固執二字爲訛訛。殊不知二字是好字。中庸以擇善固執爲誠之者。事人苦不能固執。從波隨風而已。以是爲病。世道人心。所以不古人若也。

天地間人。通功易事。便能道並行而不相悖。處處周行

也。通義達道。最可體味。

學者自朝至暮。無小大。無隱顯。舉足動念。無非仁義二字。方是居仁由義。方能熟于仁。精于義。

禮以辨尊卑。等貴賤。別内外。故曰。唯禮可以已亂春秋之世。臣弑君子。子弑父。下陵上替。妾婦乘其夫。小人加君子。故夫子汲汲然與弟子習禮。觀論語曰。爲國以

禮又曰能以禮讓爲國何有意可見矣桓司馬爲其不便于已故削迹伐檀甚至欲殺孔子此與秦始焚書坑儒同一意也蓋惡其欲興禮樂而已易言艱貞人欲固守其貞非艱不能賢人處亂世當求言艱貞之義

隆萬以來朝野只成奄然媚世之習是非不敢別白善惡不欲分明直道而行四字我生之後殆不復見今日學者將欲爲隱居以求其志當從見善如不及見不善如探湯起欲爲行義以達其道當從舉直錯枉過惡揚善與斯民行三代直道起

近世匪人固多學爲包承者吾人但當安守其否以俟道亨不可以彼包承乎我自失其守也慎之慎之井田封建固能使物物各得其所然行之實難故曰堯舜猶病也聖人治天下只通功易事使有菽粟如水火人倫明于上小民親于下有恒產有恒心不至于放僻邪侈陷于刑罪而大弊所不能亦不强也天地間人智愚强弱生質各有定分强者不能使之弱弱者不能使之强智者不能使之愚愚者不能使之智聖人爲治特使教化明而風俗美强不至于暴寡智不至于欺愚鰥寡孤獨廢疾者有養而已至于耳

目心力之所不及。則固無如之何也。堯舜猶病。病以此耳。論語說到修己安人便佳。蓋安人亦便是老者安。朋友信。少者懷之意。然欲人人如此。便不能。故論仁智。只說舉直錯枉。使枉者直。蓋不仁者遠。便是至治也。今思三代而下。限田之制亦難行。經界之法不可不行。故孟子曰。仁政必自經界始。

楊朱言義而不及仁。故其敝爲拔一毛而利天下不爲。墨翟言仁而不及義。故其敝爲摩頂放踵而利天下爲之。子莫言義不至子楊。仁不至子墨。則親親而無殺。尊賢而無等。仁義兩失之矣。所以俱爲執一而賊

道。唯孟子爲大中至正。以其得聞于子思。顏學孔子也。

敬義夾持。人知爲程子之言。而不知其出于文言。敬以直內。義以方外。敬以直內。義以方外。人知爲出于孔子。而不知敬勝怠。勝義勝欲。勝太公望。陳丹書已諄諄矣。故曰。若太公望見而知之。由太公至程子。其揆一也。

損而後益。堯舜其猶病諸。弗損益之。天施地生。其益無方。故无咎。天無私覆。地無私載。日月無私照。霜露無私墜。故曰。得臣無家。如是則凡有血氣。莫不尊親矣。

故象曰：弗損益之，大得志也。

或言某友生質淳厚，操守也好。讀書亦多，儘虛心好學。但于出處之際，及儒之與釋界限，不肯分明說。曰：看論語篤信好學，章自見。果能有學有守，則出處之分自明。去就之義自決。此友恐是長厚有餘，明斷不足。臨大節未必不失足也。

公孫朝仲尼焉學之間。非子貢不能答。陳子禽必聞其政之間，亦非子貢不能答。故曰：智足以知聖人，乃夫子于其前嘆莫我知。所以發子貢之間也。下學上達，知我其天之語。非夫子自言。雖子貢亦誠有所不能。知猶之發憤忘食云云。子路雖欲對葉公，亦有所不能云爾。吾人志于聖賢，下學之功，須從不怨天不尤人起。然欲上不怨天下，不尤人，須自正己而不求于人起。欲正己而不求人，須從素位而行，不願乎外起。試思心之不正，身之不修，病根都在何處，豈非自天子以至庶人，壹是皆以妄求願外爲心，心安得而正。身又何自而修乎。吾與人言，所以亟亟以農桑稼穡爲主，蓋惟衣食可以無求于人，然後人心可正。教化可行。世人不察，反以小人之事見譏，可嘆也。

能反求諸其身，然後可以居仁由義，備大人之事。否則

一言一動是皆穿窬之類而已。

人才本于道德。固是第一等。然朝廷用人。只是才智之士。爲多。故曰。舉賢才。才智之士。使能盡用之于正。卽是人才。自古帝王之興。用以致太平者。多是生于亂世之人。正如春夏之木。繁枝邃實。蔚茂離披。卽是冬間枯木朽株也。

目前有幾件急着緊要。做得方好。科目不可不罷。官制不可不改。資格不可以不破。軍政不可以不修。農田水利不可以不講。秀才不可以不親官政。

極敝之法。得良人爲之。亦不至于大厲。極良之法。使不善人行之。亦足以爲害。正如青苗之行。當時程明道韓魏公所治之部。决不病民。周家徵法。陽貨榮夷等行之。決是爲暴。所以求賢用人。不可不汲汲也。今之爲致知功夫者。多主良知。自有天則之說。而求其虛靜專一。以俟端倪之自見。雖做到極好。不過如無星之秤。無寸之尺而已。雖聞有所見。亦祇約略近似。而非至當之則。何況往往失之偏枯淺陋。未必足以通天下之志乎。所以不如窮格事物之理。求規矩權衡于古昔先王也。

仁義要躬行實踐。故曰爲仁義。又曰行仁義。方實能有

諸已否則究是空言于自己無得力處也。欲得人心正而人才出必先學術正世教明然學術所以得正世教所以得明必須人倫明大經立今日吾黨窮而在下教課子弟須使讀正經親正人行正道言正言所謂六陽從地起使天地之心復見而後無負上天之生人爲萬物之靈也。

備忘卷四終

備忘錄遺

清江桐鄉張履祥念芝氏著

日本安中板倉勝明節山氏校

自佛入中國從來爲禪學者不曾侵入聖人正道自張子詔改頭換面以出便有雅鄭紫朱之亂至象山陽明則不復辨別矣不辨而歸人皆惑量卦九三晉事到處不去決當有一善處之方所謂術也又不入權詐一路此非愚忠愚孝所能爲故曰德慧術知觀舜處父子兄弟之間綽綽有餘

有從事於克己而不能復禮者。未有禮復而已不克者。故關中之學以知禮爲先。知禮則成性矣。勿以已不重貨而謂人皆輕財。勿以已不作僞而謂人皆崇信。勿以已常不較而謂人皆雅量。持此三者以處世。庶乎遠害矣。

譬如寫字。朱子教人去臨帖。陸子教人信手去寫。自出心畫。雖云寫到好處。臨摹的也成字。信手的也成字。然終是倣古的。易成而敗筆少。近見人也有好筆姿。也勤於書寫。杜撰去伸紙臨池。全不像樣。

好議論先儒而申已說。世之爲良知之學者。無不中此。

病。此人身在習中轉移而不自知。更說甚性。且去將信而好古一語。仔細思之。友人有以文字相質。蓋駁其後下條同。

孟子說個形色。是發前聖之未發。程子說個氣質。是又補孟子之未發。

年雖有早暮。志氣總不可一日而衰。世雖有治亂。綱常總不可一日而廢。

程朱之門多恭敬撙節退讓之士。近世講學之徒。躁競而已矣。躁競之士。罕不爲小人。此病東林與姚江皆甚。

仁者無私心而合天理之謂。吾前時亦爲良知之學。於今思之。雖無私心。郤多不合天理。程子有言。雖無邪心。苟不合正理。則妄也。乃邪心也。故誠身之道。以擇善爲先。

學者德器要深重。德器深重。可以任重致遠。間三月不違。與日月至焉。內外賓主之辨。曰。仁本是固有。本是主。但有生以後。天理人欲互爲消長。顏子是天理常存。而人欲間發。則理是主。而欲爲賓。其餘天理未能勝乎人欲。則似人欲反爲主。而天理偶然來復。郤似賓也。

大都君臣朋友。取其相濟。主德剛則臣以柔濟之。主德柔則臣以剛濟之。朋友亦然。

象山言義利。言充四端。先立乎大處。極親切。蓋其生平用力在此。但從此以上。更有無限功夫。正當遜志時。敏以造乎精微之域。郤不宜便泰然自足。人之爲善。必有所由。由秉彝好德一念來。雖旋作旋止。終是策勵得起。若有所爲而爲之。則其爲之必不力。雖一時果銳。旋即衰止。以其無本也。

水利不講。農政廢弛。未有如近代之甚者。遵民之多。亦官未有如近代之甚者。海內如何不虛耗乎。

官多則人才不足。必濫取以備員。祿薄則難以養廉。必詭利以欺人。朝廷與士人兩失之道也。凡舉事斷之于心。公私揆之於義。是非合之以情。從違審之以勢。輕重故動而不括。功成而天下安之。陽明之言易使知德者厭。以其多夸也。濂溪明道之書。陽明也。理會一過。郤只長得他一邊見識而已。伊川考亭則有意與之爲難。故一切以已意排擊。而不必當其情實。所以深惡之者何。濂溪明道之言寬大。儘可從他假借。伊川考亭之言緊嚴。假借不得。所謂罪我者其惟春秋也。

唐史稱侍臣請集太宗文章。太宗不許曰。人主患無德政。文章何爲。斯言不獨爲帝王者當知。自公卿大夫及士庶人皆然。自漢以後。作者代多。因而相煽成習。人率以文章爲不朽之事。至於今日。斯風尤甚。人不恥無行而恥無文。初學後生。輒自作文集。以誇於人。而冀傳於後。究其所爲。何文之有。何章之有。廉恥道喪。莫此爲甚。

自私自利之心。盜滌既盡。使潔淨之質已具。然後加之學問。可以充實光輝。

貨惡其棄於地。不必藏於己。力惡其不出於身。不必爲己。學者舉足動念。輒能如此。方能馴至天下爲一家。中國爲一人。雖在畎畝之中。不失天下歸仁之量。若始初卽懷私已一念。且未論行事鄙猥。不足以服邱民之心。便是勲烈蓋世。終必寵利居成功。其餘弗足觀也已。

讀書數十卷。而不能化導門內。真所謂未免爲鄉人也。

詩哲夫成城。哲婦傾城。夫非哲不足以成城。婦非哲不

足以傾城。赫赫宗周。褒姒威之。褒姒之色。必是美於申后。其才智必是過於申后。然而威周者必褒姒也。故曰。懿厥哲婦。爲梟爲鵠。懿美也。當時之人。無不知其爲梟鵠。而幽王則以爲懿美。唯其以爲懿美。故褒姒得肆其爲梟爲鵠之惡。而至於威周耳。幽之爲幽。亦是亂亡之後。人從而謚之。則然在幽王。豈不自以爲聰明過人。褒姒才智足以佐我政治。而公侯卿士。皆足以籠絡顛倒。豈知其爲厲之階乎。程子謂下愚不移。其質非必昏。且愚也。往往強戾。而才力有過人者。聖人以其自絕于善。謂之下愚。然則幽王特以惑

於褒姒而忘其身。內而夫妻父子。人道之大倫。外而天下國家存亡之大數。俱有所不見。故曰幽。所謂近不見眉睫。大不見泰山也。

自古人倫之亂。其流禍非數世不定。國之興家一也。其端多開於女戎。歐陽公云。自古女禍大者亡天下。其次亡家。其次亡身。身苟免矣。猶及其子孫。雖遲遠不

同。未有無禍者也。然原其本末。未始不起於忽微。斯言真萬世龜鑑矣。

綱常倫理之際。一念隱慝。其禍敗必中於身。以及其子孫。蓋天道也。子曰。我誰欺。欺天乎。

天下之理。不待安排造作。故曰易簡而天下之理得矣。

孔子稱管晏。孟子羞稱管晏。其義一也。

或疑於陽明劉先生稱之

今吾黨惡之。得無人同異。故應之以此。

墨翟知愛所以爲仁。而不知愛之理。故曰兼愛。告子知事之宜爲義。而不知爲心之制。故曰義外仁義二字。朱子註得無漏。

人之過失。約有二種。其一是無心之失。其一是不知義理。若知義理不當爲。而有意故爲之。則懲矣。尚書刑故無小宥。過無大蓋。以此也。

五行無制。則不成用。金不得火之制。則不成從革之用。

火不得水之制則不成炎上之用。水不得土之制則不成潤下之用。土不得木之制則不成稼穡之用。木不得金之制則不成曲直之用。故曰王不琢不成器。人不學不知道。師友者制我以有成者也。吾於孔子得二語。曰鄉人之善者好之。其不善者惡之。於孟子亦得二語。曰觀近臣以其所爲主。觀遠臣以其所主。人論觀。

人性皆善。本無惡。其惡皆出於過與不及。過不及皆生於蔽。所以蔽陷離窮。以蔽爲首。論語六言。六蔽。六言文本皆美德。蔽則不難至於爲惡。周子通書。所以有剛

柔善惡之論。洪範所以有剛克柔克之訓也。

仁者見之謂之仁。智者見之謂之智。百姓日用而不知。只是蔽於此者。不見乎彼。

今之讀書。徒爲空言。不及行事。固爲無實。終於無所得。亦有專於人事上打算。而不能潛心讀書。以求進於義理。終於固陋鄙野。不能造於高明之域也。况此等人臨著做事。見識短淺。應機遲鈍。甚或見此而忘彼。執滯而不通。多至於敗事乎。

朱子之教。大約使人先明好惡。蓋纔遇一人。便有善惡。以及智愚賢不肖之別。纔遇一事。便有是非可否邪

正之別纔一言入耳亦便有是非得失合義理不合
義理之別善則好之不善則惡之真有如好色惡臭
之喻然用心一過不免失之太刻所以吾人時時當
念中庸寬裕溫柔及尚書有容德乃大之語以補其
所偏譬如服藥服單方久便苦失之偏勝也

陶靖節屈三閭二人相似覺得靖節爲優然三閭終是
三代人物後世不及也

高忠憲謂君子以清勤慎做人小人以清勤慎做官此
便是有所爲而爲與無所爲而爲之別然若是果肯
以清勤慎去做官職業亦是盡得民生亦不擾得豈

不爲彼善於此但辨之不可不早

求異於人卽異端求合於人卽鄉原盡其當然之分則
依乎中庸也

白沙謂從聘君學其於古聖賢垂訓之書蓋無所不講
然未知入處比歸白沙於是舍彼之繁求我之約唯
在靜坐久之然後見吾此心之體常若有物日用應
酬隨吾所欲如馬之御衡勒也愚謂是前時在聘君
之門有此一種功夫故靜坐而或有所得也此段文
字病痛根本

清談廢事人知咎古不知懲今

知行二字偏重不得。空知與冥行其失均也。若論今日自應以篤行救之。


聖人制禮只是順性命之理。

恒心有無興亡治亂皆決於此。

三代而後賓興之典既廢朝廷不得不設科以取士。取士之法莫善於漢。莫不善於唐。蓋天下之人唯祿利一路可以鼓舞得人。以力田爲科則可使海內無閒田。以孝悌爲科。可以使亂臣賊子不作。人才出風俗美。海內富實。士農兵強。視以辭賦奔走天下之人何啻千里。

備忘錄遺終

備忘錄跋




楊園先生洞悉經義。扶助世道。
可謂成己成物君子矣。家兄節
山氏。好讀洛閩遺書。頃得先生
所著備忘錄。喜之。反覆玩味。至
忘寢食。余因閱之。每章每句。純

粹謹飭。一出于正。上溯洛閩。以達洙泗之源。宜乎家兄之喜之也。夫明季異端紛興。人心惑溺。然斯道不墜于地者。寔先生之功也。古人有握一紺珠。以自照平生所忘者。吾人處世。遺忘于

道者多矣。展玩此書。輒知求放心。學者宜以此錄充紺珠。庶可不負先生備忘之名也。家兄不堪獨自喜之。欲刊布以與人偕喜之。亦慕先生成己成物之意也。可不憇憇哉。於是乎跋。


天保丙申初冬之吉。

勝殷叔行謹識



臣津金豐章再拜敬書

喜之。市
不貲未生事
心學未宜以
直義多矣。安
道義多矣。安



天保八年丁酉晚冬發兌

京都寺町通松原下ル

勝村治右衛門

大坂心齋橋北久太郎町

河内屋喜兵衛

大坂心齋橋通安堂寺町


秋田屋太右衛門

江都神田通新石町

須原屋源助




書物問屋



1 2 3 4 5 6 7 8 9 90 100 1 2 3 4 5 6 7

清 張楊園先生著



備忘錄

全四冊

甘雨亭藏



